



Broj: 01/2-02-2-12389-4/21  
Sarajevo, 12-07-2021

Na osnovu članova 99. i 103. Zakona o zdravstvenom osiguranju FBiH (Službene novine FBiH br. 30/97, 7/02, 70/08, 48/11 i 36/18), člana 17. Statuta Zavoda zdravstvenog osiguranja Kantona Sarajevo („Službene novine Kantona Sarajevo“, broj: 4/00, 18/12, 30/08, 1/12 i 15/13), člana 29. stav 1 Zakona o liječenju neplodnosti biomedicinski potpomognutom oplodnjom ("Službene novine Federacije BiH", broj 59/18), a u vezi sa članom 3. Pravilnika o obimu prava na biomedicinski potpomognutu oplodnju na teret sredstava obaveznog zdravstvenog osiguranja i načinu formiranja cijene pojedinačnih postupaka biomedicinski potpomognute oplodnje ("Službene novine FBiH" br.50/20) i važećih Smjernica za liječenje neplodnosti, Upravni odbor Zavoda zdravstvenog osiguranja Kantona Sarajevo na 2. sjednici održanoj 12.07.2021. godine, donosi:

### Odluku o pravu na liječenje biomedicinski potpomognutom oplodnjom

#### I

Ovom Odlukom se utvrđuju uslovi i kriteriji za ostvarivanje prava na refundaciju troškova za pruženu uslugu biomedicinski potpomognute oplodnje (u daljem tekstu: BMPO) bračnom odnosno vanbračnom drugu – osiguranim licima Zavoda zdravstvenog osiguranja Kantona Sarajevo (u daljem tekstu: Zavod).

#### II

Pravo na biomedicinski potpomognutu oplodnju (u daljnjem tekstu: BMPO) iz sredstava obaveznog zdravstvenog osiguranja, uz ispunjavanje uslova iz čl. 21. i 22. Zakona o liječenju neplodnosti biomedicinski potpomognutom oplodnjom ("Službene novine Federacije BiH", broj 59/18 - u daljnjem tekstu: Zakon), imaju punoljetni i poslovno sposobni žena i muškarac koji su u braku, odnosno u vanbračnoj zajednici i koji su u dobi koja omogućava obavljanje roditeljskih dužnosti, podizanje, odgoj i osposobljavanje djeteta za samostalan život, te uz kumulativno ispunjavanje sljedećih uvjeta:

- a) da par nema djece - izjava;
- b) nalaz doktora medicine specijaliste ginekologije i akušerstva, kojim se potvrđuje:
  - da su provedeni postupci utvrđivanja uzroka neplodnosti ili smanjenja plodnosti u skladu sa Smjernicama za liječenje neplodnosti (u daljnjem tekstu: Smjernice) donesenim na osnovu člana 23. stav (3) Zakona,
  - da postoje indikacije za BMPO u skladu sa Smjernicama,
  - da su iscrpljene sve druge mogućnosti liječenja neplodnosti, ili kada hirurška, medikamentozna ili kombinirana terapija nije moguća ili nije uspješna,
  - da je provedeno liječenje parova u skladu sa Smjernicama,
  - da su partneri informirani o BMPO u skladu sa članom 32. Zakona;
- c) da je obavljeno testiranje u partnerskoj donaciji u skladu sa Smjernicama, i to: anti-HIV-1 i anti-HIV-2, HbsAg i anti-HBc, anti-HCV (antitijela na hepatitis C) i sifilis - specifični ili nespecifični treponema test - laboratorijski nalaz;
- d) da je žena u dobi do navršene 42. godine života,

(2) Izuzetno od stava (1) tačka d) ovog člana, na prijedlog stručnog konzilija zdravstvene ustanove u kojoj se liječe bračni, odnosno vanbračni drugovi, a iz opravdanih zdravstvenih razloga, može se dati saglasnost na BMPO i ženi nakon navršene 42. godine života, a u skladu sa Smjernicama.



(3) U cilju dokazivanja prava iz člana 2. ove Odluke potrebno je dostaviti slijedeću dokumentaciju:

- Ovjerena izjava da par nema djece,
- Izvod iz matične knjige vjenčanih za bračne drugove, a u slučaju vanbračne zajednice ovjerena notarska izjava ne starija od 6 mjeseci,
- Originalni računi za obavljene usluge,
- Otpusno pismo sa nalazom i mišljenjem ljekara specijaliste iz zdravstvene ustanove u kojoj je BMPO postupak obavljen,
- Broj tekućeg računa podnosioca zahtjeva izdat od banke,
- Konzilijarno mišljenje KCUS-a - kopija,
- Obavijest o prebivalištu izdatu od strane MUP -a,
- Eventualno drugu dokumentaciju u svrhu dokazivanja ispunjenosti uslova propisanih ovom Odlukom.

### III

O pravima utvrđenim ovom Odlukom, ocjenu i mišljenje će davati Komisija koju će imenovati direktor Zavoda posebnom Odlukom.

Na osnovu mišljenja Komisije iz stave 1. Ovog člana radiće se Rješenje u nadležnoj službi Zavoda, u skladu sa odredbama Zakona o upravnom postupku (Službene novine FBiH br. 2/98 i 48/99).

Poslovi i zadaci koje će obavljati Komisija, biće utvrđeni Poslovníkom o radu Komisije.

### IV

Na osnovu izdate saglasnosti Zavoda zdravstvenog osiguranja Kantona Sarajevo, bračni, odnosno vanbračni parovi ostvaruju pravo na postupak BMPO u zdravstvenoj ustanovi koja ima rješenje federalnog ministra zdravstva za obavljanje BMPO na području Federacije Bosne i Hercegovine (ovlaštena zdravstvena ustanova) u skladu sa Zakonom i s kojom nadležni kantonalni zavod zdravstvenog osiguranja ima sklopljen ugovor za pružanje usluga BMPO.

### V

(1) Pravo na liječenje putem BMPO na teret sredstava obaveznog zdravstvenog osiguranja, u pravilu, ima žena do navršene 42. godine života, koja je u braku, odnosno vanbračnoj zajednici, i to u sljedećem obimu:

a) tri pokušaja intrauterine inseminacije:

- prvi pokušaj se finansira u iznosu od 100% cijene utvrđene u Tarifi zdravstvenih usluga,
- drugi i treći pokušaj se finansira u iznosu od 50% utvrđene cijene iz alineje 1. ove tačke.

b) pet pokušaja vantjelesne oplodnje:

- prvi pokušaj se finansira u iznosu od 100% cijene utvrđene u Tarifi zdravstvenih usluga,
- svaki naredni pokušaj finansira se u iznosu od 50% cijene utvrđene u Tarifi zdravstvenih usluga za embriotransfer ili kompletan postupak vantjelesne oplodnje.

c) pohranjivanje spolnih ćelija, spolnih tkiva i embriona:

- za prvu godinu pohranjivanja finansira se u iznosu od 100% cijene utvrđene u Tarifi zdravstvenih usluga,
- za svaku sljedeću godinu finansira se u iznosu od 30% utvrđene cijene iz alineje 1. ove tačke.

(2) Ukoliko nije došlo do trudnoće u postupku intrauterine inseminacije iz tačke a) stava (1) ovog člana,

par konzumira pravo, a shodno medicinskim indikacijama, na postupak vantjelesne oplodnje iz tačke b) stava (1) ovog člana.

- (3) Pokušaj u smislu ove Odluke je postupak vantjelesne oplodnje koji se završava jednim embriotransferom.
- (4) Troškovi lijekova padaju na teret ličnih sredstava pacijenta, s tim da pacijent ima pravo refundacije tih troškova u obimu kako je to utvrđeno po vrsti postupka iz stava (1) ovog člana.
- (5) Priznavanje troškova za lijekove za stimulaciju ovulacije obavljat će se na način utvrđen u stavu (4) ovog člana do donošenja Odluke o izmjeni Liste lijekova obaveznog zdravstvenog osiguranja Federacije Bosne i Hercegovine.

## VI

Refundacija troškova za usluge BMPO, vršiće se do utroška planiranih sredstava predviđenih Finansijskim planom Zavoda za tekuću godinu.

## VII

Ova Odluka stupa na snagu danom donošenja, a primjenjivaće se od zaključivanja prvog ugovora za pružanje usluga.

Danom početka primjene ove Odluke, Odluka o refundaciji troškova za pruženu uslugu medicinski potpomognute oplodnje br. UO/06-4-25776/17 od 14.07.2017. godine i Odluka o izmjeni Odluke o refundaciji troškova za pruženu uslugu medicinski potpomognute oplodnje br. 01-03-UO-3-40861/19 stavljaju se van snage.



Predsjednica Upravnog odbora

[Redacted signature]

Prof.dr. Jasmina Selimović

Dostaviti:

- Direktor Zavoda
- Upravni odbor,
- Pravna služba,
- Oglasna ploča Zavoda,
- Interna revizija,
- Sektor za ekonomiku i finansiranje,
- a/a

